

श्री हनुमान चालीसा

॥ श्री हनुमते नमः ॥

श्री हनुमान चालीसा



SHREE HANUMAN CHALISHA

॥ दोहा ॥

श्रीगुरु चरन सरोज रज, निज मनु मुकुरु सुधारि । बरनऊँ रघुबर बिमल जसु, जो दायकु फल चारि ॥  
बुद्धिहीन जानिके, सुमिरौं पवन-कुमार । तनु बल बुद्धि बिद्या देहु मोहिं, हरहु कलेस बिकार ॥

॥ चौपाई ॥

जय हनुमान ज्ञान गुन सागर । जय कपीस तिहुं लोक उजागर ।

रामदूत अतुलित बल धामा । अंजनि-पुत्र पवनसुत नामा ॥

महाबीर बिक्रम बजरंगी। कुमति निवार सुमति के संगी।

कंचन बरन बिराज सुबेसा । कानन कुंडल कुंचित केसा ॥

हाथ बज्र औ ध्वजा बिराजै कांधे मूंज जनेऊ साजै ।  
संकर सुवन केसरीनंदन । तेज प्रताप महा जग बन्दन ॥

विद्यावान गुनी अति चातुर । राम काज करिबे को आतुर ।  
प्रभु चरित्र सुनिबे को रसिया । राम लखन सीता मन बसिया॥

सूक्ष्म रूप धरि सियहिं दिखावा । बिकट रूप धरि लंक जरावा ।  
भीम रूप धरि असुर संहारे । रामचंद्र के काज संवारे ॥

लाय सजीवन लखन जियाये श्रीरघुबीर हरषि उर लाये ।  
रघुपति कीन्ही बहुत बड़ाई । तुम मम प्रिय भरतहि सम भाई ॥

सहस बदन तुम्हरो जस गावै । अस कहि श्रीपति कंठ लगावै ।  
सनकादिक ब्रह्मादि मुनीसा । नारद सारद सहित अहीसा ॥

जम कुबेर दिग्पाल जहां ते कबि कोबिद कहि सके कहां ते।  
तुम उपकार सुग्रीवहिं कीन्हा । राम मिलाय राज पद दीन्हा ॥

तुम्हरो मंत्र बिभीषण माना । लंकेस्वर भए सब जग जाना ।  
जुग सहस जोजन पर भानू लील्यो ताहि मधुर फल जानू ॥

प्रभु मुद्रिका मेलि मुख माहीं । जलधि लांघि गये अचरज नाहीं।  
दुर्गम काज जगत के जेते । सुगम अनुग्रह तुम्हरे तेते ॥

राम दुआरे तुम रखवारे होत न आजा बिनु पैसारे ।  
सब सुख लहै तुम्हारी सरना । तुम रक्षक काहू को डर ना ॥

आपन तेज सम्हारो आपै । तीनों लोक हांक तैं कांपै ।  
भूत पिसाच निकट नहिं आवै । महाबीर जब नाम सुनावै ॥

नासै रोग हरै सब पीरा । जपत निरंतर हनुमत बीरा ।  
संकट तैं हनुमान छुड़ावै । मन क्रम बचन ध्यान जो लावै ॥

सब पर राम तपस्वी राजा । तिन के काज सकल तुम साजा ।

और मनोरथ जो कोई लावै । सोइ अमित जीवन फल पावै ॥  
चारों जुग परताप तुम्हारा । है परसिद्ध जगत उजियारा ।  
साधु-संत के तुम रखवारे। असुर निकंदन राम दुलारे ॥

अष्ट सिद्धि नौ निधि के दाता। अस बर दीन जानकी माता ।  
राम रसायन तुम्हरे पासा । सदा रहो रघुपति के दासा ॥  
तुम्हरे भजन राम को पावै । जनम जनम के दुख बिसरावै ।  
अन्तकाल रघुबर पुर जाई । जहां जन्म हरि-भक्त कहाई ॥  
और देवता चित न धरई । हनुमत सेइ सर्ब सुख करई ।  
संकट कटै मिटै सब पीरा । जो सुमिरै हनुमत बलबीरा ॥  
जै जै जै हनुमान गोसाई । कृपा करहु गुरुदेव की नाई ।  
जो सत बार पाठ कर कोई । छूटहि बंदि महा सुख होई ॥  
जो यह पढ़े हनुमान चालीसा । होय सिद्धि साखी गौरीसा।  
तुलसीदास सदा हरि चेरा । कीजै नाथ हृदय मंह डेरा । ।

// दोहा //

पवन तनय संकट हरन, मंगल मूरति रूप ॥ राम लखन सीता सहित, हृदय बसहु सुर भूप ॥